



PARTII INUIT INATSISARTUNI

7. aug.2013

UKA 2013/ 139

Inatsisartut suleriaasianni §36 naapertorlugu apeqqueteqaat aallaavigalugu oqallisissiaq imaattoq matumuuna saqqummiuppara

Qaffasissunik atorfillit suliunnaarsitaangaangamik imal. soraarsitaangaangamik (Gyldne håndtryk) aningaasarpassuarnik pissarsisinneqartarnerata nunatsinnut naleqqutinngittup allanngortinneqarnissaa siunertaralugu oqallinnissamik siunnersuut.

(Inatsisartunut ilaasortaq Randi Broberg Partii Inuit)

Tunggavilersuut:

Namminersornerullutik oqartussaanerup nalaanili kiisalu namminersornerulereernerup kingorna suliffeqarfiit namminersorlutik oqartussanit pigineqartuni atorfilittaasut aningaasarpassuarnik soraarnerminni ajunngitsorsiassaqaartinneqartarnerat takornartaanngeqisoq suli ukiuni kingullerni annertuumik atugarineqarluarpoq.

Tamanna Nunatta aningaasatigut ilugersunartorsiorfiani naleqqutinngilluinnartuuvoq, allanngortinneqartariaqarlunilu.

Danmarkimi nunaniluunniit allani periuseq issuaannarlugu iliornerusimappat, piaarnerpaamik nunatsinnut naleqqussarlugu aaqqiivigineqartariaqarsoraara. Illuatungaani innuttaasut inuuniarlutik ilungersortut, illuatungaani inuit ataasiakkaat taamarsuaq ajunngittorsisinneqartarnerat naapertuilluarnerunngilluinnarpoq, akuerineqarsinnaananilu.

Nunatsinni akissaasersuisarnerup naligiinnginnerujussua ersareqimmat tamanna oqaluuserisariaqarparput, pingaartumillu Namminersorlutik oqartussat suliffeqarfiutaanni akissaasersuisarneq nalilersoqqinneqartariaqartutut isumaqarfigingatsigu Inatsisartunut ilaasortat tamatumunnga qanoq isumaqarnersut inuiaqatigiinnullu qanoq oqariartuuteqarniarnersut siunertaralugu oqallinnissamik siunnersuuteqarpunga.